

AKASHVANI AIZAWL

REGIONAL NEWS BULLETIN

HEADLINES (EVENING)

1. India ram chhiarpui, Cencus of India 2027 neih mekah vawiin khan Governor, General (Dr) Vijay Kumar Singh a inziak lut.
2. Hriselna kawnga khawvel puma inzirtirna ni 'World Health Day' pualin Mizoram hmun hrang hrangah vawiin khan hun hman a ni a, thupui atan 'Together for Health, Stand with Science' tih hman a ni.
3. Kumina Akashvani kum 90-na champhaphak lawm turin Akashvani Aizawl chu ngawrh takin a inbuatsaih mek.
4. Assam, Keralam leh Puducherry assembly inthlan atana campaign chu vawiin tlai khan a tawp a, Ningani ah vote thlak a ni ang.

<><><>

CENCUS : GOVERNOR

India ram chhiarpui, Cencus of India 2027 neih mekah vawiin khan Governor, General (Dr) Vijay Kumar Singh a inziak lut.

Governor hian vawiin chawhma khan Lok Bhavan-ah Chhiarpui, Census of India 2027 Phase-I (Houselisting leh Housing Census) hnuai self-enumeration-ah hlawhtling takin a inziak lut a, India-a digital census hmasa ber kalpui chhoh mek a ni chu lawmawm a tih thu sawiin, Mizoramah pawh he hmalakna hi hlawhtling taka neih a nih ngei theih nana theihtawp chhuah turin thawktu zawng zawngte a chah a ni.

Governor chuan, Mizo khawtlang nunah midang tanpuina duhna a beh ngheh tlat thu sawiin, chhiarpui buaipuitute chu an hnathawh a lo awlsam zawk theih nan Village Council leh Local Council-tenen thawhdunna ngai pawimawh turin a chah a. Mizoramah chhiarpui tuang leh tha thei ang bera kalpui a nih theih nana theihtawp chhuah tura chahin duhsakna a hlan a ni.

<><><>

IGNOU CONVOCATION

Indira Gandhi National Open University chuan vawiin khan India ram hmun hrang hranga IGNOU Regional Centre thlan bik 39-ah zirlai pass tharte hnena certificate hlanna hun, Convocation vawi 39-na an hmang a; IGNOU Regional Centre, Aizawl atangin mi 1,200-in degree an nei thar.

IGNOU Convocation hi New Delhi-a IGNOU hmunpuiah India Vice President CP Radhakrishnan hovin hman a ni a; IGNOU Regional Centre, Aizawl atangin NIT, Mizoram director Prof. Dr. S. Sundar hoin zirlai leh zirtirtuten video conferencing hmangin an chhim a ni.

Aizawla convocation hmanpuitu NIT Mizoram Director Prof Dr S Sundar chuan zirlai degree nei tharte a lawmpui thu sawiin, an thiamna leh theihnate tipunga India ram hmasawn zel nan theihtawp chhuah turin a chah a ni.

Convocation vawi 39-naah hian IGNOU Regional Centre Aizawla zirlai 1200 in degree an nei thar a, master degree nei thar 501, bachelor degree nei thar mi 624, postgraduate diploma 2, diploma 12 leh certificate programme learner 49 an ni.

<><><>

WORLD HEALTH DAY

Vawiin April ni 7, Thawhlehi hi hriselna kawnga khawvel puma inzirtirna ni 'World Health Day' a ni a; thupui atan 'Together for Health, Stand with Science' tih hman a ni.

Vawiin April ni 7, Thawhlehi hi hriselna kawnga khawvel puma inzirtirna ni 'World Health Day' a ni a; thupui atan 'Together for Health, Stand with Science' tih hman a ni.

ZMCH-a Dept of Community Medicine demonstrator Dr Vanlalchhuanga chuan Akashvani News Aizawl a hrilh danin, kumin World Health Day thupui hian a thlurbing chu One Health approach tih a ni a, mihring hriselna mai bakah nungchate hriselna hian mihring hriselna vèk hi thui takin a hril thei a ni, a ti.

Tunlaia natna tharlam rawn chhuak - emerging infection, antibiotic resistance te leh boruak sik leh sa inthlak nasa lutukte hi mithiamte chuan thil chi khat vanga rawn awm ni loin, chhan tam tak vanga rawn awm tawh zawk niin an sawi tih sawiin Dr Vanlalchhuanga chuan, kumin World Health Day-ah hian science thiamna hmanga zirchianna (research) pawimawhziata tarlan niin, zirtirna dik lo hluar lutukte laka mipui him theih nan science thiamna hmanga finfiahna tel ngeia thil hmuh chhuahte hmanga thuthlukna siam a pawimawhzia inzirtir chu a tum ber pakhat a nih thu a sawi bawk.

World Health Day hi World Health Organisation (WHO)-in day a puan 11 zinga pakhat a ni a; kum 1948-a WHO inkhawmpui chuan World Health Day hi kum tin April ni 7-a hman thin turin a rel a, kum 1950 atangin hman tan a ni.

Vairengte-a Counter Insurgency and Jungle Warfare School te chuan World Health Day pualin vawiin khan Vairengte a Army Public School Naupang U-KG atanga Class -8 thleng te tan a thlawna inentirna Medical Camp buatsaih in Medical Health Checkup an neihpui a. He hunah hian M.I room Doctor ten naupangte hrisel na kawng hrang hrang endik sakna neiin a mamawh tan a thlawnin damdawi an pe bawk a ni.

<><><>

LADC CEM

Lai Autonomous District Council a Chief Executive Member Pu C.Lalsawmzuala'n LADC Budget chu a theih chinah ram mipuiten an chhawr theih turin ruahmanna siam a ni a ti.

CEM hian vawiin khan a Pisa ah Lawngtlaia Thuthar thehdarhtute kawmin, LADC sum indaihlohna tihziaawm a nih theih nan hna thar siam belh tum a nilo tih a sawi a, Budget Session neih zawh takah Member ten LADC Budget thar lungrual taka an pawm chu lawmawm a tih thu sawiin, Budget pumpui atangin mipui tana tangkaitur thawh nan Cheng Nuai 827.35 lai dah a ni a ti.

Pu C.Lalsawmzuala chuan LADC hnuaiia thawk, Pension a chhuak te chuan an pawisa hmuhturah harsatna an tawk mek tih sawiin, heih kum engemawzat kalta atanga awm tawh a nih thu a sawi a, mamawh zualpui phuhruk nan Cheng Nuai 300 dah a ni a ti a, heng bak ah hian hmasawna hnathawhna tur hrang hrang dah a ni a ti bawk.

LADC Budget Session hi April 2 khan zawh fel niin Chhiah tling khawm atanga hmuhtura beisei Cheng Nuai 510 telin Budget hi a vaiin Cheng Nuai 28,028.63 niin, kum kalta aiin Nuai 1584.56 in a tam a ni.

(Lalnggheta Ralte, PTC Lawngtlai)

<><><>

AKASHVANI 90 YEARS

Akashvani chuan kuminah kum 90 a tling dawn a, Akashvani kum 90-na champhaphak lawm tur hian Akashvani Aizawl chu ngawrh takin a inbuatsaih mek.

Akashvani Aizawl Director leh Mizoram Cluster Head Pu DR Lalropuia kaihhruiin vawiin khan Akashvani Aizawl hotute an thukhawm a, Akashvani kum 90 tlin lawmna tur hrang hrang rel niin ropui taka lawm tum a ni a, Akashvani bultan ni June ni 8 ah programme buatsaih tum niin hemi hma hian kum 90 tlin puala hun hrang hrang buatsaih tum a ni bawk.

Director Pu DR Lalropuia sawi danin Akashvani kum 90 tlin pual hian ramchhunga hmun hrang hranga lawmna hun buatsaih ani dawn a ti a, Mizoramah pawh ropui taka lawm tum ani tiin inbuatsaihna chak taka kalpui chhoh mek ani tih a sawi bawk.

Akashvani kum 90 tlin rual hian Akashvani Aizawl pawhin kum 60 a tling a, heng ni pawimawh pual hian Akashvani Aizawl chuan state chhungah lawmna hrang hrang buatsaih a tum a ni.

(Desk)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

TOURISM MINISTER

Tourism Minister Pu Lalngthinglova Hmar chuan Tourism hmasawn nan Mizoram sawrkar in theihtawpin hma a la a ti a, a hlawkna tel tur chu mipuite an ni tih a sawi.

Champhai Kahrawta lungphun a hawna ah he thu hi sawiin Khuallian Pu Lalngthinglova Hmar chuan Tourism hmalakna tharah mipui hna hlawkna thei an ngaihtuah tih sawiin tualchhungah eizawna tam zawk a awm theih nan theihtawp an chhuah mek thu a sawi a ni..

Minister chuan khualzin dawnkawn kawngah mipuite hmasawn an ngai tih sawiin khualzin tam thei ang berin Mizoram an tlawh theih nan tanrual a pawimawh thu a sawi a ni.

Heritage & Cultural Center leh Eco Resort Experience at Keilungliah hi Tourism Department hmalakna niin Swadesh Darshan 2.0 hnuai hmalakna a ni a, Eco Resort Experience-ah hian cottage, naupang infiamna hmun leh khualzin mamawh hrang hrang siam a ni dawn a, Heritage and Cultural Center-ah hian multipurpose hall siam a ni dawn a ni.

(Lalhluuia, PTC Champhai)

<><><>

RD&AD MINISTER

Rural Development & Administration Department Minister Prof. Lalnilawma'n Mizoram tungding turin village council atanga bultan a ngaih thu sawiin khawtlang hmasawnin ram hmasawna a thlen tih a sawi.

Khawzawla District Panchayati Resource Centre office leh hostel building a hawna ah he thu hi sawiin Prof. Lalnilawma chuan VC-te an inthawm chak theih nan leh khawtlang tan tha zawka hna an thawh theih nan VC Act thar, The Mizoram (Village Councils) Act, 2025 siam a nih thu a sawi a. Mizoram tungding turin village council atanga bultan a ngaih thu sawiin, VC-te chu an hmazawn theuha theihtawp chhuah zel turin a fuih a. khawtlang hmasawnin ram hmasawna a thlen tih a sawi.

DPRC office building leh hostel building sakna tur hian Ministry of Panchayati Raj (MOPR)RGSA atangin nuiah 100 ve ve dawn a ni.

(Lalsangpuii, PTC Khawzawl)

<><><>

OIL&GAS

Lunglei District-a Flying Squad chu an Leader SDC Pu H. Lalthlengliana'n hovin Lunglei khawpui chhunga tualhthei zawrhna leh gas agency te a hmunah kal chilhin an endik.

Endiktute hian tualhthei leh LPG chhek khawl sa chu a tam tawk tih sawiin tun dinhmunah harsatna an awmlah thu an sawi a, Gas Agency te chuan tun hnaia mipuite harsatna tawh tam ber chu online-a LPG book, Delivery Authentication Code (DAC) an dawn theih loh avang te, call a tlang theih loh avang te leh Gas Agency-te'n system-ah an lo khawih ve ngai a awm thin avang te'n gas book tumte'n harsatna an tawk thin tih an sawi a. Gas chu single connection-ah ni 25 hnuah, double connection-ah ni 35 hnuah leh BPL connection-ah ni 45 hnuah chauh book nawn theih a nih thu leh DAC tel lo chuan gas pek

chhuah theih a nih loh thu sawiin, khawl lam chian loh avang hian agent leh mipuite'n harsatna an tawh thin tih an sawi a. Gas book chungchanga harsatna nei leh DAC dawng thei lote chuan Gas Agency-te pan thin se, a hmunah chin fel theih tam tak a awm tih an sawi.

(Thangmingliana Renthlei, PTC Lunglei)

<><><>

ELECTION CAMPAIGN

Assam, Keralam leh Puducherry assembly inthlan atana campaign chu vawiin tlai khan a tawp a. Hmun hrang hrangah Political Party hruaituten campaign tawp ni ah theihtawp an chhuah a ni. Union Home Minister leh BJP leader senior Amit Shah-a chuan vawiin khan Assama Patharkandi ah thu sawin West Bengal ah BJP an sawrkar chuan dan kalha lo lut ru zawng zawng an thawn let vek dawn a ti a. Assam Barak Valley ah Congress ten heng dankalha lo lutte hi an lo tuamhlawm nasa hle niin a puh bawh a ni.

Congress President Mallikarjun Kharge pawhin vawiin khan Guwahati ah chanchinbumite kawmin BJP hruaitute leh Assam Chief Minister Himanta Biswa Sarma te na taka bein an chhungkaw hamthatna tur chauh ngaihtuahah a puh a. Himanta nupuiin rampawna ro thil a chheprelh thu leh ram pathum laiah passport a nei chu sawrkar laipuiin chhui se a duh thu a sawi a ni.

Assam ah hian seat 126 ah inthlan a ni ang a, Keralamah seat 140 leh Puducherry ah seat 30 ah Ningani ah inthlan a ni ang.

Tamil Nadu Assembly inthlan leh West Bengal inthlan thawhkhatna chuh tumte tana nomination thehluh te chu vawiin khan endik a ni a. Tun thla ni 9 thleng inhnudawhna hun hawn a ni a. Tamil Nadu ah hian seat 234 ah vote thlak a ni ang a. West Bengal ah hian inthlan thawhkhatnaah seat 152 ah vote thlak a ni dawn a. Tun thla ni 23 ah inthlan a ni ang a. Tun thla vek ni 29 ah West Bengal Assembly inthlan thawh hnihna hi neih a ni ang.

(Newsonair)

<><><>